

欽定剿平粵匪方略

欽定剿平粵匪方略卷三十七 癸丑年

五月初一日乙巳兼署閩浙總督福建巡撫王懿

德奏言臣前因湖北武昌被賊攻陷深恐賊氛漸熾蔓延他省卽與兼署督臣怡良密商通飭

閩省水陸各營各按兵額挑選三分之一以備臨時調用茲聞逆匪由九江安慶等處竄擾江甯距閩雖覺稍遠而浙省切近江蘇其勢實更

可虞閩浙係屬聯疆交界各處亟宜未雨綢繆  
查浦城縣所屬楓嶺等隘直接仙霞嶺爲由浙  
入閩門戶該處山高路窄險要異常若能鎮以  
重兵不難出奇制勝臣當飛咨福建陸路提臣  
炳文到省面商卽令前往該處扼要駐紮仍就  
近分調延建各營兵由該提臣統率調遣如續  
有調派卽一面行文一面咨臣具奏總期迅速

無誤不敢稍涉拘泥奏入

上諭曰炳文到防後將道路遠近地方情形專摺詳細具奏設軍情緊要卽一面奏聞一面札調就近官兵以資守禦斷不可事事會該署督致誤機宜此摺寄與炳文看

同日陸應穀奏言賊匪現在鳳陽其北竄之路由天長六合至桃源爲一路由宿州至江南徐

州河南永城爲一路沿淮而上至陳州之周家  
口爲一路由蒙城亳州直走汴梁爲一路若由  
舒城六安則河南之固始光山信陽處處皆通  
是河南之防堵較多於他省而喫重亦倍於他  
省其間光固等處距賊較遠惟歸德陳州偏近  
賊氛查歸德所存兵勇不及二千名空虛太甚  
實不足以資抵禦惟有籲懇

天恩俯念防堵緊要准將定邊營兵七百名甯夏營兵  
五百名暫留歸德俟續有兵到再行酌量留遣  
且歸德爲適中之地既可屏蔽省城又可接應  
鹿柘沈項等處臣擬卽駐紮歸德較爲扼要奏  
入

上命軍機大臣傳諭陸應穀曰昨因鳳陽府城失守曾  
諭令善祿兼程進剿並諭該撫將永城現留防兵酌

撥前進毋庸截留陝甘後起官兵本日據陸應穀奏稱歸德存兵無多請將定邊甯夏營兵暫留歸德俟續有兵到再行酌量留遣自係爲防堵緊要起見惟鳳陽要地業已失陷正須各路大兵合力兜剿前後赴皖之兵合計雖有七八千名其相去較遠者恐一時未能趕到儻該處兵力不敷防剿致賊他竄則裹脅愈多賊勢益張更將滋蔓難圖該撫仍當酌量情

形統籌全局總宜先其所急切不可稍分畛域致誤  
事機該撫現已馳往歸德扼要駐紮卽著妥爲布置  
相機調遣無稍疏虞

上  
又命軍機大臣傳諭李德曰前因賊擾滁州意圖北  
竄當經諭令李德派兵嚴防徐州要地保衛糧臺諒  
已督辦妥協布置周密矣現在鳳陽失守徐州萬分  
喫緊著李德卽督飭帶兵各員扼要駐紮嚴密防堵



以爲皖省聲援後路續到官兵應如何改道行走不致紆折遲誤卽一面飭知地方官妥爲應付一面咨明帶兵大員督催前進萬不可稍涉拘執致誤事機

初二日

丙午

王懿德奏言粵匪竄擾江甯浙省之

備禦宜嚴閩省之籌防亦不容緩特以處處設兵防不勝防且聞逆賊未到之先每有本地奸匪設計搖惑故欲破奸計必先固民心欲固民

心莫如舉行團練惟非公正紳士交相勸勉董率而力行之則小民觀感無由又誰肯居安思危爲有備無患之計相應請

旨卽飭在籍之福建紳士尙書銜廖鴻基等會同籌辦團練事宜以補兵力所未逮總期官民聯爲一體不致滋生事端奏入得

旨允行

同日周天爵呂賢基奏言賊匪初竄浦口不過  
二三千人沿途裹脅勾結不止倍於正賊現據  
稟探賊匪竄擾鳳陽府縣兩城仍踞臨淮並分  
股竄擾懷遠難保不別懷詭計此時續到漢中  
兵五百餘名善祿所帶駐紮永城之兵已到六  
七百名卽令其暫於宿州南路附近安營與臣  
呂賢基面商防禦事宜臣周天爵督同舉人臧

紆青帶兵由固鎮懷遠等處四面圍剿臣呂賢  
基已令員外郎孫家泰帶勇二千協同壽春鎮  
總兵玉山赴鳳陽會剿儻該匪等聞風畏懼舍  
臨淮而他竄臣周天爵卽跟蹤進剿並於沿淮  
上下分撥兵勇擇要堵截以期滅此醜類惟現  
在兵力尙單不敷堵剿查有慧成所轄之西安  
漢中固原等處官兵計可陸續到宿勢不得不

集賢堂  
二  
先其所急暫濟燃眉況現在鳳陽一帶待援甚急但使淮北一路稍可敷衍仍須分兵李嘉端藉資防守

周天爵又奏言賊踞臨淮雖屬分股實其精神所專注臣駐兵淮北已據上游現撥兵屯於十里城等處賊自不能泝淮直上並可出兵夾擊一鼓殲滅所可慮者賊由裕溪口入巢湖以通

餉道並分股接應鳳陽上泝淮河下通洪澤以  
裕餉源若兩者俱不得手則必全力直趨黃河  
決計北上是河北安危形勢不在清江一路而  
全歸徐宿矣現在安省淮北一帶止有臣截留  
之客兵與宿遷舉人臧紆青赴援之練勇倉卒  
支特暫救燃眉臣於無可奈何之際輾轉籌思  
惟有刑部侍郎奕經及奕紀兩人臣皆知其心

地質直當此逆賊北竄防剿需人相應請

旨飭下奕經等迅赴徐州於黃河南北兩岸嚴查奸細  
督拏土匪與臣等互相應援奏入

上命軍機大臣傳諭周天爵呂賢基奕經托明阿李嘉  
端善祿曰本日據周天爵等奏督同舉人臧紆青統  
帶兵勇由固鎮懷遠等處圍剿呂賢基亦令隨帶司  
員孫家泰帶勇二千協同總兵玉山赴鳳陽會剿此

時善祿統帶之兵及陝甘官兵計已趕到並著周天爵酌量調遣托明阿想亦帶兵馳抵該處賊黨多係土匪乘其大股未來紛竄未定之時著周天爵會同托明阿等迅爲布置四面兜剿萬不可任賊他竄到處勾結再滋蔓延現在賊踞臨淮徐州一帶關繫緊要卽著奕經帶兵前往扼要駐紮與周天爵等互爲聲援堵賊北犯仍一面防其竄越清江之路周天爵



係特派勦辦賊匪大員誠惻朕所素知一切調度自能與該侍郎將軍巡撫等籌度緩急相機應變無待朕再三諄諭也奕紀前已有旨交恩華差遣委用矣

同日楊文定奏言四月二十日臣由大港移舟丹徒鎮港口維時和春已知照提臣鄧紹良由陸路進擊一面會商葉常春等督率艇師起碇惟夾板商船究因船身笨重不能挽動暫泊焦

山門下其餘艇師各船由焦山口甘露寺至鎮城大馬頭一帶見各處停泊賊船百餘隻當卽開礮迴環轟擊賊船亦揚帆開礮拒敵岸上賊設礮臺並連開大礮我師隨攻隨進擊壞賊船三十餘隻燒燬十餘隻轟斃沿岸逆匪數十名賊船不能抵禦急行返櫂竄往上游各船水勇乘勝追至瓜口復轉戰多時因風轉西艇師不

能再進二十二日早風色正北偏東其勢甚大  
各鎮將督率艇師及夾板商船又復揚帆進攻  
時提臣鄧紹良亦由陸路統兵向鎮城攻擊惟  
甘露寺山上築有木城一道內有賊營六座礮  
臺多座該逆早於營外整隊排列搖旗吶喊連  
開大礮我船冒險直前開礮轟擊各匪紛紛倒  
地餘俱逃竄入營本擬卽攻瓜口無如由鎮至

瓜乃由南轉北本日風逆不能上駛仍轉至南岸一帶攻擊該逆勢難支持分股繞出又被擊斃無數臣查瓜口賊船雖止百餘隻難保不去而復來至鎮江城垣該逆俱加築高厚池亦鑿深東西南三面均無營壘獨於北面臨江建營寨設礮臺豎木城自係深畏水師加意警備第水師不能登岸難以拔取城垣勢必由陸路設

法進攻始能得手 臣前赴陸營與提 臣鄧紹良  
面商據稱總以三千斤大礮一尊轟城爲要 臣  
悉鎮城非一礮所能拔隨商聲東擊西之計分  
營晝夜輪擊俟其稍懈然後一鼓咸登剋期收  
復再浙江藩司麟桂遵

旨來江與 臣督率礮船現已於四月二十二日到丹徒  
港水營會籌一切

同日雷以誠奏言臣於四月二十日自清江浦起程路過淮安府高郵州寶應縣皆親赴城中查閱城垣均屬可守惟揚州環攻兩月之久尙未收復賊匪又分竄臨淮滁州查係由揚城竄出至浦口時黑龍江官兵不戰自潰至裏下河十州縣地方遼闊港汊紛歧下游處處可以通江上游則直達清淮儻一爲賊擾則清淮三面

受敵北上之路更難防禦是保守下游乃目前  
至急之務臣擬先就裏下河一帶布置周密必  
使能守而後能戰再黃河南北兩岸現有宗室  
突經楊以增合力防堵但臨淮關旣失盱眙洪  
湖順風一日夜直抵蔣壩尤宜防守嚴密現經  
河臣分派兵勇前往仍請

飭加意慎重毋稍疏虞均奏入

上命軍機大臣傳諭雷以誠曰現在逆匪分股竄擾蘇州臨淮關鳳陽等處沿河地方十分緊要雷以誠係特派巡查河岸大員仍著會同楊以增認真查閱嚴防各處渡口以杜奸匪偷越毋稍疏虞至各州縣應如何設法防堵嚴密布置卽知照琦善慧成等妥速籌辦

上又命軍機大臣傳諭向榮怡良許乃釗鄧紹良和春



麟桂曰現在各路師船會集江面所調三千斤大礮  
想已運到急宜乘勝進攻該大臣務卽督飭鄧紹良  
和春麟桂等統帶水陸兩路將弁合力進攻掃除江  
面賊船使江甯鎮江逆匪不能相顧剿辦自易得手  
至竄擾滁州臨淮之賊前據慧成奏稱係由金陵分  
股茲據雷以誠奏稱係由揚州竄出此股逆匪現已  
竄入鳳陽不可不杜其來路著該大臣等迅速偵探

賊蹤派兵堵截絕其後路應援自無難盡數殲滅本日已諭令琦善等嚴密查拏設法防剿該大臣等總當統籌全局無論江南江北務須不分畛域一體知照嚴防該逆竄逸是爲至要

上又命軍機大臣傳諭琦善陳金綬勝保慧成曰逆匪分擾鳳陽仍踞臨淮前據慧成奏稱係由金陵分股本日復據雷以誠奏滁州臨淮之賊係由揚州竄至

浦口等語究竟此股逆匪由何處分出自應偵探明確防其續竄之路本日已諭令向榮等查探嚴防矣賊情詭譎異常避實擣虛是其慣技且時有奸細出城探聽消息彼知大兵均在揚州一路堅拒不出牽掣我師而以夥黨竄越滁鳳一帶若不截其江口竄路恐我軍圍困孤城賊勢已蔓延徐宿軍情緩急殊難遙度該大臣等務當隨時偵探迅圖克復揚城仍

須統籌水陸全局淮揚爲清江咽喉餘鳳亦徐州門  
戶所有現到官兵及後路續到之兵應派何人赴援  
何人接應何處賊情緊急無論江省皖省均應嚴密  
堵截毋令賊匪竄逸切不可稍分畛域致誤事機

同日張芾奏言前據禮部尙書奕湘奏湖北江  
西徧山產木可隨時砍伐等語臣查江省雖亦  
產木之區較楚省不過十分之三近因逆匪滋

擾各商裹足急切殊難購辦祇有權用停運漕船於小孤山一帶江渚聯泊環以木簞卽於木簞上紮立木城又於木城外連排大竹鼓斜遮護足禦一切火器內駐兵勇多設礮位以資堵擊此外另紮小筏以備各種火攻之法但木簞非剋期能辦卽擬以現難解京之額木借應急需當飭將此項木植運往湖口紮簞與所調漕

船相爲輔翼現時大營屢獲勝仗恐賊四竄必須嚴防非厚集重兵不能制勝目下江省無兵可撥就近而論惟兩湖之兵一水可通移緩就急亦係爲兩湖外固藩籬之計可否請

旨飭下兩湖督撫酌撥精兵遴委勇敢將官帶領馳赴東西梁山及四合山裕溪口等處會同周天爵調度以堵爲勦臣所備糧船木簰並駐紮兵勇

仍可駛往下游爲進攻應援之助奏入

上命軍機大臣傳諭張亮基崇綸張芾曰張芾奏籌設江防權用停運漕船借用解京額木編造木簰並請飭兩湖督撫酌撥兵弁赴東西梁山等處會同周天爵堵剿等語該逆被剿窮蹙難保不竄回上游自應先事籌防而此時又難紛紛徵調重煩兵力著該督撫各就地方情形擇要布置設一旦賊匪竄出不能

揚帆上泝方爲有備無患

初三日丁未琦善陳金綬奏言前因逆賊分股由

滁州北竄已嚴飭西淩阿等迅速跟蹤追剿並  
飭浦口六合儀徵等處官兵加意嚴防各路要  
隘以杜該逆後路接應俾竄擾鳳陽股匪黨孤  
勢蹙易於殲除頃接西淩阿等報稱本月二十  
二日賊匪回竄至滁州十里山岡地方經西淩



阿等督帶官兵與賊接仗殺斃賊匪數百名賊  
卽潰亂惟該逆詭譎多端恐仍乘虛奔突臣等  
酌量緩急欲逆賊之迅就撲滅先須斷其策應  
今艇船止二十餘隻加以舢船巡船三板船亦  
止四十餘隻似不能擊毀無數賊船而臨淮以  
北直達徐宿靈壁以南固鎮王莊一帶與臨淮  
較近且當北路之衝臣琦善已飛咨周天爵托

明阿督帶兵勇進駐固鎮王莊等處合力迎擊  
以免賊匪渡河北竄並咨呂賢基李嘉端探明  
賊蹤隨時就近知會以便撓剿其臨淮以南滁  
州等處有黑龍江馬隊跟蹤追擊至北岸上游  
和州亦通大江要路實在無兵可分其浦口六  
合儀徵等處防堵官兵原杜逆賊接應若一經  
調動賊必上岸分擾爲害甚烈是北岸防堵之

兵尙形單弱萬不可稍有調動而臨淮有河阻  
隔不能從滁州尾追且迤東可以直達揚州抄  
我兵後路又可循洪澤南岸繞赴清江一帶臣  
琦善已囑勝保酌帶兵勇由天長盱眙斜趨臨  
淮阻其繞赴揚州清淮之路卽與托明阿合力  
痛擊兼可就近督催西凌阿等進剿總期及早  
殲滅使該逆不敢再萌北竄之心至攻剿揚城

自二十一起迄今七晝夜未嘗少息二十二  
日酉刻該逆從南門突出二三百人意在逃竄  
經派防南門蔣王廟一帶之侍衛德興阿等帶  
兵迎擊該逆旋退入城二十三四兩日總兵雙  
來等復將天甯門一帶城垛轟塌十餘丈轟缺  
城身數處該逆仍隨時補築抵死抗拒頃探得  
自江甯駛來賊船一百餘隻在瓜州停泊臣等

恐其順流而下必先將江面攔截使賊聲氣隔  
絕無接濟應援之路然後可望成功再前此黑  
龍江官兵在浦口遇賊情形雖未能竭力堵禦  
然以臣細覈情節是西渡阿明慶遇敵在前烏  
凌額魁福帶兵在後俱與賊接仗屬實嗣逆賊  
由浦口分股上竄滁鳳臣恐其意圖北竄急商  
令勝保統帶兵勇馳往臨淮一帶兜剿惟各路

帶兵俱係大員必待往返函商殊失事機並請  
旨飭令勝保酌量情形緩急無論何項官兵一面咨明  
臣琦善一面就近飛調以期於事有濟奏入

上諭曰勝保帶兵馳赴安徽甚妥江南賊船陸續駛來  
江北顯係東西兩路牽掣我軍揚州城必須及早克  
復以杜彼覬覦之心至黑龍江官兵戰敗情形似帶  
兵官心不齊以致各不相顧勝保著准其酌量調撥

不必處處札商汝與慧成兩路總得聲息相通方能  
有濟

同日署四川總督慧成翰林院侍讀學士晉康  
前任江蘇按察使查文經奏言臣等抵灣頭後  
於二十四日三更整隊前進直攻揚州東門因  
聞南門忽開恐其潛襲我後卽於二十五日未  
刻收隊回營臣晉康查文經親自督師察看城

頭旗幟紛布守城賊隊並不忙亂恐其暗有準  
備非僅虛張聲勢查西北城門久閉僅留南門  
似欲乘機南遁而另股則北擾滁鳳臣慧成奉  
調西北官兵僅到一千九百五十名以之防堵  
北路兵力實形單弱且東路霍家橋仙女廟一  
帶上可旁趨清淮下可偷渡蘇常均須分撥兵  
勇駐紮然愈分愈單惟有仰懇



皇上天恩俯准飭催前調各兵星速前來以資接應傷  
揚州東北兵力不能厚集他處又復紛紛截留  
一有疏虞在臣等固不足惜而清淮震撼北竄  
堪憂矣奏入

上諭曰豈有同是此賊皆攻此城兩軍聲息並不相通  
之理賊雖無大技而死黨心堅官軍雖盈千累萬各  
不相下無怪乎我軍勢散難禦飄忽之逆匪也

上命軍機大臣傳諭琦善陳金綬勝保慧成曰昨據琦善等奏於四月二十等日進攻北門之東城門轟塌城垛等情茲據慧成奏抵濟頭後於四月二十四日進攻東門該匪負隅死守並未敘及琦善是否同日會合攻剿該署督與琦善共圍一城自應互相知照聲勢聯絡同心合力迅殄賊氛方爲不負委任朕以江北諸軍統歸琦善節制調度又恐大兵進攻賊匪

窮蹙乘間北竄復命慧成督兵馳抵淮徐一帶爲人  
軍應援是慧成統帶之兵卽係琦善等軍營接應之  
兵無論江省皖省東西兩路均應隨時偵探擇要調  
遣防賊北竄今觀所奏不但置滁鳳於不問卽與琦  
善等軍營聲息亦似絕不相通殊不可解至所稱賊  
匪似欲南遁而另股則北擾滁鳳復稱東路一帶上  
可旁趨清淮下可偷渡蘇常究竟現在賊匪欲由何

路南遁由何路北竄是否偵探確實如何派撥準備  
所奏均未明晰該逆以烏合之衆尙能結成死黨日  
久負嵎大兵徵調不爲不多而統兵者竟似各不相  
下且但知將續調之兵統歸一路而不顧他路之或  
有疏虞所謂統籌全局者安在耶現在揚城之賊如  
何可以攻克江口之賊如何可以截斷東路要隘如  
何設防西路滁鳳一帶賊匪如何急圖剿滅琦善總

統諸軍責無旁貸陳金綬勝保均係幫辦軍務慧成  
經朕特簡督兵爲大軍聲援值此軍情萬分緊急之  
時朕南望焦憂寢食俱廢尙何暇各持意見耶該署  
督此次摺報晉康查文經竟似幫辦軍務慧成尙非  
糊塗無知何遽出此耶總之江皖東西兩路肅清賊  
匪惟諸臣之功儻調度失機致賊北竄亦惟諸臣之  
罪朕惟知賞功罰罪無取空言也

初四日戊申向榮許乃釗奏言賊勢縱橫皆由江面船多所致屢蒙

皇上訓示火攻之法至再至三無微不至臣等愚見以爲焚燒尤宜散遣四月十八十九等日觀音門外各賊船忽行忽止日凡數變水手無所適從臣等委已革知府陳景曾遊擊蔡應龍及本地紳士前往該處諭以大義給以免死路票並帶

官兵接應至二十二日各船戶遂與該逆決裂  
各將船隻焚燒自寅至午火光不絕燒斃押船  
長髮賊無數此外各船有由夾江開往大江零  
星逃散者統計不下一千數百隻散遣水手不  
下一萬餘人此皆城北觀音門外散遣各船情  
形也惟是三山石城兩門及江東柵欄等門停  
泊船隻多踰數倍聞其中尙有該逆輜重防守

更嚴恐城北各船解散情事尙未周知或仍聽  
迫脅駛赴上下游滋擾尤須勦撫兼施現又疊  
經散給告示儻能一律散盡該逆江上無船可  
通則南北之路中斷賊膽愈寒陸路更得手矣  
臣等仰體

皇上好生之德使各省被難船戶人等不致橫遭焚斃  
而賊黨從茲解散江面可望肅清至下游艇船



共到七十餘隻一遇東北大風卽可上駛攻擊  
至上游礮船之外雖已添設大小木簕椎江水  
日長江面愈寬若賊船大隊揚帆擁上恐礮船  
爲數無多尙難抵禦臣向榮已疊飭總兵和春  
俟有順風卽統帶艇船二十隻駛至上游與礮  
船會合防剿不敢因解散已有成效而於攻擊  
之事稍涉鬆懈也奏入

上諭曰如此辦理甚好攻剿之力不可稍懈慎之慎之  
同日楊以增奏言清江背河倚湖旣爲各路衝  
要又爲南北咽喉自賊竄滁鳳以後臣與奕經  
托明阿熟商遏賊分竄必須水陸兼防惟洪湖  
周圍數百里水面則波濤浩淼陸路則灘岸迴  
環現在兵力較單且無戰艦若俟其入湖而後  
議剿制勝綦難查盱眙縣之浮山與對岸泗州

之潼河相距僅二里許水面較窄但能兩岸嚴  
守匪船自不能飛越然清江在洪湖下游濱湖  
各處不能不嚴益加嚴現經知縣吳棠雇募湖  
船水勇排泊湖內與洪湖營兵互爲應援聲勢  
頗壯臣原擬月內與奕經輪流前往盱眙浮山  
口駐防惟聲東擊西是賊慣技不可不豫爲計  
及現在各處精兵均趨西路清江尤爲緊要自

當遵

旨偵探賊情與奕經隨時相機防勦並繪具洪湖圖貼

說敬呈

御覽奏入報

聞

初五日己酉  
慧成晉康查文經奏言臣等拏獲奸

細嚴愷訊據供稱逆匪現議挖掘地道意圖劫

營槍礮等語臣等一面知會琦善等大營一面  
由臣晉康臣查文經分帶旗綠各營整隊前進  
臣慧成親自督隊並派副都統常清隨赴東南  
一帶埋伏伺其出城迎擊四月三十日果有賊  
匪偷搭浮橋由天甯廣儲兩門地道豕突而出  
幸琦善勝保等早有準備出賊不意奮力攻擊  
殲賊千有餘名賊匪奔回爭渡擠折浮橋墜河

死者不計其數未渡之賊復被我兵截殺無遺  
臣等因賊匪詭詐西北受創必折回東南正在  
嚴防閒卽見賊匪多人由東關城上遙擁而來  
臣等速放槍礮火箭燒燬望樓擊死賊匪無算  
城上人旗旋即藏匿是否故示虛怯抑係潛圖  
南竄均未可知當卽選派勁兵一千名偃旗息  
鼓前赴南門外嚴家窪地方以扼旁竄

慧成又奏言臣連日接奉

諭旨命臣與琦善等迅圖克復揚州並統籌水陸全局

以遏北竄惟現在東北兵力太單僅有官兵二千臣所調後路各兵已被紛紛截留目下攻擊揚州事在垂成儻該逆乘虛竄突深爲可惜惟有仰懇

聖恩俯准於後路續到清江之吉林兵及熱河綏遠歸

化等處官兵酌量抽撥二三千名庶可外禦鎮  
江內攻揚郡不令窮寇四竄以顧全局奏入

上命軍機大臣傳諭琦善陳金綬慧成曰逆匪欲窺東  
北城地道意圖劫營搶礮經慧成等拏獲奸細訊出  
賊情卽速知會琦善等大營俾有準備出賊不意擊  
斃及墜河死者不計其數逆匪受此大創技窮勢蹙  
惟據稱城上人旗旋卽藏匿難保不另作詭謀希圖



他竄該署督已派兵一千名前赴南門外嚴家窪地方扼賊南竄之路所慮亦尙周密勝保現已統兵往剿除鳳賊匪琦善陳金綬慧成等務當趁此聲威同心協力督飭各路兵勇四面圍攻剋期收復昨據向榮等奏設法焚燒賊船千餘隻遣散船戶水手約萬餘人若將江面賊船截斷令賊南北不能兼顧則三城更易克復該大臣等仍須互相知照毋失事機至

慧成請於續到清江各兵酌量抽撥二三千名此項官兵原爲江北後路策應而設現在滁鳳一帶勦賊亦關緊要除托明阿奕經等所帶各兵外卽著琦善與慧成於續到之吉林等處官兵內酌量調撥擇要布置總期揚城兵力足資攻勦而滁鳳徐宿之間亦不致稍有疏虞方爲妥善

同日雷以誠奏言查清江浦並無城郭又非要

盜臣在清江時本無一兵一卒卽稽查黃河渡口大權盡在河臣不過按日據各屬稟報一次大半具文因聞逆賊竄擾浦口六合犯及滁鳳等處竊計揚州諸軍必有前後莫顧之勢又聞諸軍現皆缺餉臣體察事機不敢置身局外是以奏請親赴淮揚各處巡查直抵揚州以期聞見確實臣現駐仙女廟距揚城甚近甫募之勇

教練未熟所以不辭艱險保守裏下河者因募  
勇籌餉尙有可爲不特爲清淮東路門戶且以  
牽制逆賊北竄之路總期合力堵禦以遏兇鋒  
奏入

上命軍機大臣傳諭雷以誠曰揚州裏下河一帶地方  
遼闊自應妥爲布置以防賊匪竄逸該副都御史旣  
稱募勇籌餉尙有可爲卽著迅速籌辦仍隨時知照

琦善慧成一體嚴防至稽查黃河渡口最關緊要雷  
以誠係特派大員豈得任聽各屬一稟了事現在揚  
州賊勢已蹙難保不分遣匪黨四路窺探著雷以誠  
一面設法保衛裏下河地方一面同楊以增等嚴密  
巡查河岸如有奸匪偷越立即掩捕無稍疏虞

初六日

庚戌

琦善陳金綬勝保奏言逆賊於四月

三十日由天甯門旁暗門突出千餘人用木架

搭浮橋頓時過河勢甚猖獗復從廣儲門北門  
竄出多賊分東西兩股夾擊另股從旁斜行衝  
突經總兵雙來等分投兜剿始則槍礮齊施繼  
則刀矛相接該逆三退三進拌死抗拒雙來親  
執大旗奮力先趨衆弁兵踴躍齊上殲斃一千  
餘人生擒四十餘人復經李英魁等分投截殺  
或數百名至數十名不等該逆回竄擁過浮橋

木梁折斷紛紛落水淹死無數未能渡河之賊  
全行殺盡至西門之賊雖亦偷窰暗門並未竄  
出此次接仗統計殲斃淹死者不下三千餘人  
實屬大快人心惟聞新江口江面逆船乘風揚  
帆駛過三山江面不知何意臣等仍當設法攻  
剿不敢稍遺餘力奏入

上諭曰雙來屢次出力實屬奮勇著賞給白玉翎管一

支隨報發去

同日陳啟邁奏言前據慧成奏請移糧臺於宿  
遷臣查徐州人心因皖省警報疊至頗爲震恐  
若將糧臺遽行挪徙必更驚疑臣與徐州道王  
夢齡再四熟商不能不示以鎮定一面馳稟臣  
慧成臣李德迅撥援兵一面就存城兵勇酌量  
布置其黃河各渡口所派官弁嚴檄加意查察



旬日以來輿情漸就安帖嗣接皖省疊報逆匪  
滋擾鳳陽後仍在臨淮屯踞因聞重兵雲集四  
面會剿有分股西竄之信又有逃赴泗州謠傳  
宿遷距泗僅踰百里現在托明阿已由北路帶  
兵迎頭截擊李德亦馳赴宿遷臣俟東三省官  
兵需用鍋帳各項趕緊督造完備再將糧臺移  
紮就近供應前路但賊蹤靡定仍當隨時察看

情形未敢拘泥以昭慎重而免疏虞奏入

上命軍機大臣傳諭陳啟邁曰逆匪竄擾滁州鳳陽經周天爵等督兵圍剿現在勝保亦由揚州率兵進擊其揚州賊匪疊經琦善慧成等攻剿獲勝辦理正在喫緊之時糧臺支應最關緊要必須擇地安頓保衛無虞著陳啟邁隨時察看情形是否仍須駐紮徐州抑當移於宿遷就近供應隨時酌量辦理

初七日

辛亥

陸應穀奏言本月初二日接據探報

賊匪竄至蒙城滋擾約有一萬餘人賊船三四  
百號查蒙城距亳州僅一百數十里豫省歸德  
陳州所屬半與潁亳等處毗連賊匪若由蒙城  
西向則商邱鹿邑陳州均屬喫重且亳州爲入  
豫門戶該州兵勇無多臣已飛飭參將苗樟管  
帶山西官兵馳赴亳州之北以爲應援臣將歸

德應辦事宜料理完竣卽行親督兵勇前赴商  
邱之宋家集扼要紮營該處係入汴省及至歸  
德要道並可兼顧鹿邑永城設有警信卽行迎  
前截擊並一面飛咨周天爵善祿各帶兵勇前  
赴蒙亳太和交界之雒河集併力會剿以期一  
鼓殲滅陳州駐兵甚單且無大員統率臣又飛  
咨南陽鎮臣柏山挑帶精兵星馳前往適中要

卷之四十三  
三  
隘駐紮巡防賊匪現已北竄安徽宿州等處無  
須重兵河南爲直隸秦晉藩蔽關繫甚重臣所  
帶兵勇僅止三千有餘不敷布置所有調赴山  
東之未到陝甘官兵一千五百餘名相應請  
旨一併截留豫省調遣以資防堵奏入

上命軍機大臣傳諭陸應穀曰該逆自竄擾鳳陽後退  
踞臨淮復斜出蒙城裏衆西竄是明知徐宿一帶援

兵踵集又爲此聲東擊西之舉祇須合力兜剿萬不  
至直撲汴梁該撫現擬馳赴商邱之宋家集扼要堵  
截並先派參將苗樟往亳州以北援應復咨總兵柏  
山前至陳州一帶適中駐紮著卽相機調度擇要防  
剿後起未到之兵亦卽飛催前進留備堵擊仍與周  
天爵等合力兜截切勿以有用之兵零星分布轉致  
單弱前據向榮奏查獲金陵城中賊首寄江北僞諭

有林鳳詳李開芳吉汶元等賊目姓名察其語意是賊匪後路無援專以裹脅爲事該撫卽體察確探絕其裹脅之路則賊勢自孤勦辦當可得手

上又命軍機大臣傳諭恩華曰本日據陸應穀奏探聞賊由西路竄擾蒙城該撫已親帶兵勇在商邱一帶防堵該尙書現帶官兵前赴淮徐著卽於沿途確探賊蹤如徐宿緊要卽著督兵前進爲周天爵等後路

應援儘該匪全行西竄河南歸德等處情形喫重著  
卽馳往會同陸應穀督勦務當先其所急毋失事機  
上又命軍機大臣傳諭周天爵呂賢基善祿李嘉端曰  
逆賊竄擾蒙城豫省防堵喫緊陸應穀已帶兵勇前  
赴商邱之宋家集扼要駐紮周天爵此時督帶兵勇  
馳抵何處善祿想已由永城入皖著卽探明賊蹤所  
至迅速督兵截勦趁該匪等奔突無定之時一鼓殲



除勿令再行滋蔓本日已諭令托明阿奕經各帶勁  
兵星馳進剿復令江忠源帶領楚勇會同夾擊其臨  
淮鳳陽現在匪黨盤踞情形如何琦善所派黑龍江  
馬隊是否能從後追擊絕其來路此股賊匪竄入皖  
境爲數本少所稱萬餘人多係裹脅或土匪勾結如  
能設計解散四路兜拏尙不難於掃蕩切勿稍涉延  
緩致誤事機

上又命軍機大臣傳諭奕經托明阿曰前以賊匪竄擾鳳陽節經降旨令托明阿帶兵迎擊復令奕經督兵繼進本日陸應穀奏賊匪於本月初二日竄至蒙城該撫親帶兵勇前赴商邱之宋家集扼要駐紮惟截留各兵僅三千餘名兵力尙單等語現已諭令周天爵善祿各帶兵勇扼要會剿復令恩華於後路接應江忠源星速赴皖相機進攻著托明阿奕經確探賊

蹤何路緊急卽由何路督勦該匪紛竄未定撲滅尙  
易爲力務期及早殲除不致再有延蔓

上又命軍機大臣傳諭江忠源曰前因賊匪竄擾滁鳳  
一帶曾降旨令江忠源帶勇迅赴鳳陽會同勦辦本  
日據陸應穀奏探聞賊竄蒙城逼近豫省江忠源此  
時想已管帶楚勇馳入皖境著於沿途探聽賊蹤所  
至或從後抄擊或迎頭攻勦該臬司素悉賊情諒能

相機迅速應援務將此股賊匪剋期殲除勿任其西竄豫境北竄徐宿是爲至要